

Lajčák: “Nema alternative postizanju napretka u BiH”



<?xml:namespace prefix = o ns = "urn:schemas-microsoft-com:office:office" />“Politička elita u Bosni i Hercegovini navodi kako svi žele evropske integracije, ali očigledno postoji nedostatak opredijeljenosti za promoviranje evropskog plana i traženje zajedničkog stanovišta”, rekao je danas u Briselu visoki predstavnik i specijalni predstavnik EU Miroslav Lajčák u obraćanju Komitetu za politička i sigurnosna pitanja, jednom od ključnih organa vanjske politike EU.

Uprkos velikoj podršci za integraciju u EU koja postoji među stanovništvom, politički lideri još nisu u stanju da uspostave saradnju da bi postigli pomake na putu prema Briselu. “Dijametralno suprotni i nekompatibilni stavovi glavnih lidera potiskuju umjerene stavove, što otežava postizanje dogovora o ključnim pitanjima”, rekao je Lajčák, navodeći reformu policije kao očigledan primjer trenutnog zastoja.

“Reforma policije je značajna sama po sebi, ali isto tako ona je od prevashodnog značaja kao uvod u parafiranje i potpisivanje Sporazuma o stabilizaciji i pridruživanju”, naglasio je visoki predstavnik i specijalni predstavnik EU. “Dobra vijest je da se proces nastavlja i da imamo sve učesnike na okupu. Ono što je nejasno jeste da li su domaći lideri opredijeljeni za postizanje rezultata”.

Visoki predstavnik i specijalni predstavnik EU ponovio je svoje opredijeljenje za postizanje sporazuma o reformi policije do kraja septembra, što bi predstavljalo “ključnu mjeru na izgradnji povjerenja” i “preokrenulo sadašnji negativni trend koji preovladava još od aprila 2006. godine”. To bi također stvorilo uslove u kojima bi imalo smisla

razgovarati o ustavnoj reformi.

Istovremeno, Miroslav Lajčák je naglasio: "Nema alternative napretku. Niti za BiH, niti za EU. Ne možemo si priuštiti da posmatramo kako jedna od ključnih zemalja važnosti na zapadnom Balkanu ide unazad. Stabilnost u regiji je suštinski važna za našu sopstvenu sigurnost".